

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

26 Janvier 2018

(08 Jamad'ul Awwal 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « *Avertissement Divine* ».

وَمَا كُنَّا مُعَذِّبِينَ حَتَّى نَبْعَثَ رَسُولًا

Wa maa kunnaa mu 'azzibiina hatta nab-'asa rusuulaa.

Nous pas puni (ene peuple) tanque (Nous) pas envoye ene messenger. (Al-Isra 17: 16).

Mo bane frères et sœurs, réfléssi bien. Dès le début de sa l'année 2018 là, l'île Maurice pé passe dans ene situation difficile. Quand zot penser ki dès le premier jour de nouvel an (le 1^{er} Janvier 2018) ene grand accident fine arriver kot deux frères fine trouve la mort, et ensuite le lendemain ene ex-époux fine touye so ex-épouse par balles (quand sane-là fine vine rendre visite à so zenfant dans la caze de so ex-époux) et ensuite missié là fine suicide li.

Dès le 1^{er} Janvier, la pluie pas fine arrête tomber; bane gros la pluie fine tombe sans cesse sauf dimanche le 07 Janvier 2018. Kan l'école fine réprend, le 08

Janvier 2018, sa bane la pluie torrentiel là fine continuer ziska faire bane inondations, ki fine détruire bane champs agricoles (fruits et légumes) et bane aménités (par exemple, meubles, électroménager, manger etc.) de bane milliers la caze ainsi ki bane l'auto et les autres véhicules. Ensuite ene cyclone dangéré, Berguita, fine vine encore aggrave les choses depuis Mardi le 16 Janvier ziska le 18 Janvier 2018 et pour la première fois à Maurice (après plusieurs l'années) plisse ki cinq milles dimounes, missiés, madames et zenfants fine alle dans bane centres de refuge, en quittant zot la caze et tous zot bane meubles, manger et bane les autres aménités, kot zot fine prend zis zot propre les corps et bane membres de zot familles pour mette zot à l'abri contre sa cyclone là. Bane travailleurs sociales et même le gouvernement fine distribué zis bane paquets biscuits et bane bouteilles de l'eau en soutien à tous sa bane dimounes là.

Après le passage de Berguita, bane légumes et bane fruits fine kaziman disparaite de bane étagères dans bane bazaars et points de ventes et pour bane fruits et bane légumes restant, prix fine monté en flèche et li fine vine bien difficile pour la nation mauricienne vu la hausse de bane prix à tous les niveaux. Sa bane la pluies torrentiels là, ainsi ki la foudre et l'arrivée de cyclone Berguita fine cause pas mal de dégâts au niveau national, kot bane drains et canaux fine boucher, et kot alors bane la ri fine inonder et fine détruire bane véhicules aussi. Ensuite nous fine trouve ene accalmie dans la densité de la pluie dans certains régions du pays, mais dans bane les autres régions la pluie pas fine arrête faire dégâts.

La situation fine vine alarmant quand mercredi et jeudi 24 et 25 Janvier respectivement, l'avis de fortes pluies fine force le gouvernement et bane organisations concerné pou ferme bane l'écoles, bane universités et même certains sentiers de travail. Fine ena panique ici à Maurice avec la montée de l'eau et sa la pluie torrentiel ki continuel là. Vue la situation, le ministère de la santé fine conseille à la population pou bouilli de l'eau avant boire afin pour reste en bonne santé et pou évite bane maladies couma gastroentérite et bane les autres problèmes de santé. Malgré tous bane précautions ki fine prend beaucoup fine attrape aussi conjonctivite.

Li pou impossible pou moi pou énumère tous bane problèmes ki Maurice pé faire face parski nous ti l'île pé passe d'ene épreuve à ene l'autre épreuve, de façon consécutive.

Tous sa bane problèmes là paraite quand bane dimounes et le gouvernement faire sourde d'oreille à bane avertissements du Messenger d'Allah. Mais ena ene très grand différence entre sa bane calamités là et bane calamités ki tombe lor bane dimounes véridiques. Donc, ena ene grand différence entre bane dimounes ki très chers à Allah et bane ki désobéir Li et commette bane péchés.

La patience ki bane dimounes véridiques gagner, faire ki sa bane calamités et sa bane difficultés là vine couma ene source de douceur (pour zot). Zot réjouir de sa parski tous sa bane calamités et difficultés là pousse zot vers bane progrès spirituels. Sa bane épreuves là dirige zot à zot l'ascension spirituelle. Sa couma ene l'échelle pour sa bane dimounes véridiques (pour faire zot accède à bane sommets de la spiritualité).

Celui ki pas passe par bane telles épreuves et difficultés zamais pou capave progresser. D'autre part, pour ene pécheur li, sa bane calamités et épreuves ki seulement le résultat de so propre mauvais actions, zot bane vraies calamités ki apporte ene sentiment d'indignation (d'impuissance et de dégoût) ki rende la vie insupportable. Ene telle dimoune préfère la mort, au lieu pou continuer vivre. Mais bien sûr, li pas conné ki la mort pas pou mette ene fin à sa telle situation et calamité ki li pé subir là. Pour li, sa bane conditions là pou tasser avec li même ziska dans l'autre lé monde aussi.

En bref, d'après la loi de la nature concernant sa bane calamités là, bane ki zot le résultat de so propre mauvais conduite et ki bane prophètes fine victimes de sa, kot zot bizin faire face à sa bane dimounes là et zot bane mauvais ki zot faire, alors sa bane prophètes là mette sa bane kalités dimounes là en garde parski sa bane avertissement là zot destiné à accorde à sa bane dimounes là ene chance pour ki zot progresser dans la spiritualité (et abandonne zot bane mauvais conduite).

Bane ignorants pas comprend le secret de sa phénomène là; au lieu ki zot tire profit de sa et apporte ene transformation dans zot la vie, kot zot bizin tourne zot exclusivement vers le seul vrai Dieu et pas associer personne avec Li, mais malheureusement pour zot, zot préfère faire sourde d'oreille et persister dans zot l'ignorance. Ki kalité grave li grave sa, sa maladie ki appelle l'ignorance là! Celui ki ena sa maladie là dans li, li pou commence compare bane kitchoses ki incomparables. Li vraiment ene grand déception de zot part si zot compare bane

épreuves subies par bane prophètes à bane épreuves ki bane dimounes ordinaires subir.

Zot bizin rappel ki bane épreuves ki subir par bane prophètes et bane les autres élus d'Allah zot seulement ene marque d'amour (de côté d'Allah), parski à travers sa bane épreuves là, Allah accorde zot bane rangs pli élever dans le domaine de la spiritualité.

Mais quand bane malfaiteurs zot affronté à bane telles épreuves, alors sa bane épreuves et calamités là ena en vue pou détruire sa bane kalité dimounes là. Plusieurs fois, Allah (twa) fine donne moi révélation pou donne sa avertissement là à toute l'humanité en entier, ki: ene telle destruction pour arriver couma zamais fine témoigner (ou vécu, ou arriver) avant, depuis la création de l'homme. Bane pertes pou tel ki disang pou coule à flo (bane la rivières disang pou couler). Même bane zanimal et bane z'oiseaux pas pou épargné. La plupart de bane la cazes pou renverser comme si zamais ti ena dimounes ki ti habite zot avant. Bane les autres malheurs pou arriver, de différents formes, pou paraite lor la terre couma dans lé ciel aussi, et bane dimounes doué d'intelligence (bane *Ulul al-Baab*) pou reconnaite sa bane signes là, ki sa, c'est pas ene z'affaire ordinaire ki pé passer, mais bel et bien ene z'affaire extraordinaire (ki vine de la main d'Allah). L'humanité pou troublé profondément et pou demander ki pé arrive li. Beaucoup dimounes pour être sauvé, mais beaucoup aussi pou anéanti.

Bane jours zot proches, voire même zot devant la porte, kot le monde pou assister à bane scènes (z'imaze) du Jour du jugement. Aparte bane tremblements de terre, bane les autres afflictions terrifiant pou manifester, certains pou vine du ciel, et certains de la terre. Mo fine demande à mo très cher disciple Fazil Jamal de Delhi (dans l'Inde) pou faire ene compilation de tous sa bane calamités (pou note) - ki pé passer à travers le monde - dépi ki mo fine recevoir sa message divine là. Ceci afin pou gagne ene bilan de la situation au niveau mondial. *Alhamdulillah* li pé faire ene bon travail.

Donc, tout sa pou arriver parce ki l'homme fine arrête adorer le vrai Dieu; tout so l'attention étant concentré lor sa lé monde mondaine là, lor bane faveurs mondaines. Seulement bane faveurs divines ki fine vine invisibles à zot lizié. Zot fine vine aveugles parce ki zot pas trouve sa bane faveurs divines là.

Si mo pas ti vini dans sa siècle là, sa bane afflictions là ti pou retardé quelques peu, mais mo venue fine faire ki bane plans d'ene Allah ki en colère fine vine clairs après ene longue période, pareil couma Li dire (dans Quran): « **Nous pas puni (ene peuple) tanque (Nous) pas envoie ene messenger.** » (Al-Isra 17: 16).

Bane ki repentir pou sain et saufs; et pou bane ki ena la crainte d'Allah (dans zot les cœurs) avant ki ene malheur touche zot, c'est sa bane là ki pou recevoir la miséricorde divine. Eski zot croire ki zot pou à l'abri seulement par zot propre moyens contre tous sa bane kalités calamités ki pou arriver là? Non, non et non! Pas penser ki bane pays super puissant, ou mêmes bane pays moyens et pauvres et bane l'îles pou épargné! Mo craindre ki bane malheurs encore pli dure pou réserver pour zot.

Ô zot tous (toute l'humanité), zot pas en sécurité. Aucaine pays au monde pas pou épargné, même Ô zot ki reste dans bane l'îles. Aucaine (fausse) divinité ki zot fine fabriquer dans zot l'esprit pou capave aide zot.

Mo trouve avec l'œil de mo Seigneur beaucoup kitchoses terrifiant ki pou saizi sa le monde là. Le Dieu unique fine reste tranquille pendant ene temps, mais maintenant l'heure fine vini, avec mo l'arrivée, ene l'arrivée ki divinement prédestinée en tant ki l'humble serviteur d'Allah et ene avertisseur pou mette zot tous - toute l'humanité - en garde contre bane calamités ki pou accabler zot si zot pas révine vers l'adoration exclusif du Dieu Unique, Allah (swt). Allah (twa) pou montrer zot donc ene figure terrifiant (si zot pas révine vers Li). Ki celui ki ena z'oreilles tender ki le temps pas loin kot la colère divine pou saizi bane coupables.

Mo fine essaye rassembler zot tous sous la protection d'Allah. Mo fine dire zot pou oublier nous bane différences, pou être humbles, pou pas discuter dans vide et pour bane kitchoses inutile. Mo fine dire zot, pas la guerre entre nous, anou faire la paix. Et à bane ki en conflits, mo fine dire zot pou prend patience et pou rétablir la paix même si zot en raison, pou vivre couma bane frères et sœurs d'ene même papa et mama. Pas vine arrogant ou vantard. En parlant de sa, mo profiter pou passe ene message à tous mo bane disciples/ suivants à travers le monde entier: Zamais pas tourmente le messenger d'Allah, pas laisse lécoeur Allah So Messenger vine lourd avec chagrin et tristesse - quand li trouve ki zot en désaccord entre zot et kot pas ena la paix et l'obéissance pour Allah et So Messenger/ Khalifatullah. Faire attention ki ene punition terrifiant d'Allah pas entoure zot!

Donc écoute-moi, pour zot propre bien-être, pour zot propre salut, dans sa le monde là et dans l'autre lémonde, le royaume éternel d'Allah; tourne vers Allah l'Unique et demande Li pou pardonne zot pour tous zot bane péchés et manquements. Quand le messager li content avec zot (et content zot), Allah (swt) aussi pou alors content avec zot (et content zot), et Li pou dire aussi à bane anges pou content zot parski zot content et zot obéir So messager choisi. *Insha-Allah.*

Ô l'humanité, bane décrets d'Allah pou sans aucaine doute exécuter; zot pou trouve bane jours ki pé vini couma bane jours (au temps) de Hazrat Nuh (as). Mais Allah prend létemps pou manifester So colère: Li donne zot beaucoup létemps pou ki zot repentir. Alors demande pardon avec Allah pour tous zot bane péchés et faiblesses; répentir afin ki zot gagne la miséricorde d'Allah. Celui qui abandonne Allah li ene lé ver et non pas ene dimoune, et celui ki pas ena la crainte d'Allah li ene cadavre, et non pas ene être vivant.

Ki Allah guide zot lor le droit chemin et illumine zot lé cœur et l'esprit afin ki zot comprend sa Khutba là en profondeur et ki zot agir lor sa bane conseils là sans perdi létemps, et ki zot tous ensam, zot tourne zot exclusivement vers Allah, Sel Vrai Bondié et demande Li So pardon et So l'aide dans tous bane zaffaires ki pé préoccupe zot, que ce sois mondaines et spirituels. Garde la foi et confiance dans Allah et confier zot à Li, parski c'est bien Li tousel zot meilleur confident et protecteur. *Insha-Allah, Ameen.*